

ეკონომიკის როლი კონფლიქტის დარეგულირების პროცესში

The role of the economy in the conflict resolution process

მანუჩარ გუნტაძე - უფროსი მეცნიერ-თანამშრომელი

საქართველოს ხელნაწერთა ეროვნული ცენტრი

Manuchar Guntsadze - Senior Research Fellow

National Center of Manuscripts

თეზისები

ცხინვალის რეგიონის კონფლიქტი, რომელსაც ფაქტობრივად 1918 წელს ჩაეყარა საფუძველი, საბჭოთა პერიოდში „მიძინებულ“ მდგომარეობაში იყო. 90-იან წლებში კონფლიქტის გაღვივებამ ხელახლა წამოჭრა მისი მოგვარების პრობლემა. სამხედრო დაპირისპირებების შემდეგ, პოლიტიკური ურთიერთობა მინიმუმამდე იყო დაყვანილი და დე ფაქტო საზღვარიც მოსახლეობის მიმოსვლას ართულებდა. ამ პერიოდში ურთიერთობების ფორმამ გადაინაცვლა ეკონომიკური მიმართულებით. გორის მუნიციპალიტეტში არსებულმა ერგნეთის ბაზრობამ 1996 წლიდან ხელახლა წარმოქმნა ურთიერთობების საშუალება.

ერგნეთის ბაზრობა ქვეყნის ეკონომიკურ განვითარებას მნიშვნელოვნად აფერხებდა და კონტრაბანდის დიდი რაოდენობით შემოტანას უწყობდა ხელს. მიუხედავად ეკონომიკური ზარალისა, ერგნეთის ბაზრობას ჰქონდა ერთი მნიშვნელოვანი დადებითი მხარე - კონფლიქტის ზონაში მცხოვრები მოსახლეობის ეკონომიკური სარგებელი მნიშვნელოვნად იყო დამოკიდებული ერგნეთის ბაზრობაზე და შესაბამისად საქართველო რჩებოდა მათთვის ეკონომიკური სარგებლის მომტან საშუალებად. ყოველი დღის განმავლობაში დაახლოებით 150 ავტომობილი მოძრაობდა, რომლებსაც ტვირთი გადაჰქონდათ ბაზრობის ტერიტორიაზე.

ამ სიტუაციაში, კონფლიქტის მოგვარების კუთხით, იმდენად მნიშვნელოვანი არ იყო სავაჭრო პროცესების დროს მოსახლეობის ურთიერთობა, რამდენადაც კონტროლ დაკარგული ტერიტორიის ეკონომიკური დამოკიდებულება სახელმწიფოზე.

ერგნეთის ბაზრობის გარდა, ცხადია პარალელურად მიმდინარეობდა სასოფლო-სამეურნეო საქონლით ვაჭრობა, როგორც გორის, ასევე თბილისის ბაზარზე. მნიშვნელოვნად მცირე, თუმცა ეკონომიკური დამოკიდებულებისა და მოსახლეობას შორის ურთიერთობის ფორმას ეს მიმართულებაც იძლეოდა.

2004 წელს, საქართველოს მთავრობის გადაწყვეტილებით დაიხურა ერგნეთის ბაზრობა, რომელმაც ეკონომიკურ „მავ ხვრელს“ მოუღო ბოლო და ამან რამდენიმე ასეულ მილიონ ლარიანი ზარალი აარიდა ბიუჯეტს. თუმცა ამას მოჰყვა ეკონომიკური ურთიერთობების ფაქტობრივი გაწყვეტა ცხინვალის რეგიონთან, რამაც ეკონომიკას, როგორც კონფლიქტის დარეგულირებაში არსებულ ფორმას, მნიშვნელოვანი ზიანი მიაყენა.

კონფლიქტის მომდევნო ეტაპმა - 2008 წლის რუსეთ-საქართველოს ომმა - კიდევ უფრო გაართულა მდგომარეობა. საქართველოს მხრიდან თავდაცვითი ზომების ერთ-ერთ ფორმად მიღებული იქნა დე ფაქტო საზღვრების მაქსიმალური ჩაკეტვა. თუ მანამდე კონფლიქტის ზონიდან, მოსახლეობას შეეძლო სასოფლო-სამეურნეო საქონლის ვაჭრობის მიზნით ძირითადად გორისა და თბილისის მიმართულებით მოძრაობა, 2008 წლიდან ეს საშუალება მთლიანად შეიზღუდა. შესაბამისად შეწყდა ეკონომიკური ურთიერთობისა და დამოკიდებულების მეორე, შედარებით სუსტი ფორმაც.

კონფლიქტის დარეგულირებისათვის ალბათ უმჯობესი იქნება ახალი ფორმის გამონახვა, რომელიც ეკონომიკას, კვლავ მიაწოდებდა

დატვირთვას. კონფლიქტის დარეგულირებისათვის საერთაშორისო პოლიტიკურ ურთიერთობებთან ერთად, საჭიროა არ დაიკარგოს არაკონტროლირებადი ტერიტორიის გარკვეული დამოკიდებულება საქართველოს სახელმწიფოზე, რომლის როლიც ყველაზე კარგად ეკონომიკას შეუძლია იტვირთოს.